
MOCIÓN DO GRUPO MUNICIPAL DE COMPOSTELA ABERTA PARA A POSTA EN MARCHA DE POLÍTICAS LOCAIS CONTRA AS AGRESIÓNS SEXUAIS

O Grupo Municipal de Compostela Aberta, ao abeiro do regulamento orgánico municipal do Concello de Santiago, presenta a seguinte moción para o seu debate no Pleno.

EXPOSICIÓN DE MOTIVOS:

Os datos das diversas formas de agresión sexual sobre as mulleres reflicten un incremento moi preocupante nos últimos anos en Galicia. Así, a Memoria da Fiscalía publicada no ano 2020 -que recolle os datos correspondentes ao ano 2019- dá conta dun total de 1.894 delitos incoados, o que significa un incremento do 51% sobre os datos de 2018.

Estes delitos sexuais incoados duplicáronse dende o ano 2016, nunha tendencia de ascenso sustentada no tempo, cando menos dende o ano 2013. O delito de abusos sexuais é o que máis aumenta, pero tamén o fan de forma moi importante as agresións sexuais e os acosos sexuais, así como os delitos de exhibicionismo e os abusos a menores de 16 anos.

Este balance da Fiscalía está en sintonía cos datos que ofrece o Ministerio do Interior, que sinalan un incremento en 2019 do 18% dos delitos contra a liberdade sexual pasando de 536 a 636 incluíndose nesa categoría non só violacións, agresións sexuais e abusos sexuais senón a corrupción a menores o a pornografía de menores. O delito que mais aumentou foi o das violacións, nun 63%.

Se temos en conta os datos máis recentes do Ministerio de Interior respecto ao primeiro trimestre do ano 2021 indican que a cantidade de delitos sexuais cometidos continúa a incrementarse. Centrándonos no ámbito local, no termo municipal de Santiago de Compostela os delitos sexuais son os que experimentaron un maior aumento en comparación cos mesmos meses do ano anterior. No primeiro trimestre producíronse nove delitos contra a liberdade e indemnidade sexual (fronte aos 2 rexistrados no primeiro trimestre de 2020), dos que dous foron delitos de agresión sexual con penetración (non se rexistrara ningún no primeiro trimestre do 2020) e sete outros delitos contra a liberdade e indemnidade sexual. Tamén na Xunta Local de Seguridade celebrada o pasado 2 de xuño e presidida pola subdelegada do Goberno na Coruña, se puxo de manifesto o incremento significativo dos casos de violencia de xénero ao longo de 2020, e sinalouse que “actualmente hai 154 casos de violencia de xénero na cidade”.

Tendo en conta estes datos tan negativos urxe que o Concello de Santiago adopte medidas e implemente políticas contra as agresións sexuais que sofren as mulleres. Máis alá da conmemoración puntual do 25-N, día internacional contra a violencia de xénero, é imprescindible levar a cabo políticas de maneira continua durante todo o ano. As políticas contra as agresións sexuais deben centrarse nos agresores e non revitimizar nin responsabilizar ás mulleres da agresión que sofren. Precísanse unhas políticas que visibilicen aos distintos colectivos de mulleres que poden estar sufrindo agresión sexuais, mediante campañas específicas e medidas de actuación para saber que facer e onde acudir en caso de ser vítima dunha agresión sexual.

Ao mesmo tempo é urxente que os homes actúen socialmente e denuncien as agresións machistas, que tomen conciencia da necesidade de crear unha cultura de tolerancia cero e rexeitamento absoluto. É esencial que este compromiso chegue ás aulas, aos espazos actividades de lecer, aos lugares de traballo e aos medios de comunicación para que as agresións sexuais sexan denunciadas.

Neste sentido, é recomendable que estas políticas incidan na poboación moza e universitaria compostelá para impedir a normalización das agresións nos espazos de ocio. Nos últimos anos o colectivo de mulleres universitarias coñecido como o colectivo do *Campus do Medo* denunciou e visibilizou a través das redes os lugares nos que as mulleres foron obxecto de intimidacións e agresións reclamándolle tanto á Universidade como ao Concello actuacións concretas contra as violencias machistas. Lamentablemente, o Concello de Santiago continúa sen atender moitas destas demandas realizadas, como a creación de espazos seguros en Compostela. Ante o aumento das denuncias e dos casos relacionados coas violencias e agresións sexuais, a administración local e a concellería de Igualdade en particular deberían dar un paso adiante e estar máis visibles nos espazos públicos do municipio a través dos denominados “Puntos Lilas” que foron ferramentas pioneiras durante o anterior mandato. Un lugar onde ofrecer información, acompañamento e primeira atención a calquera muller que poida vivir un episodio de violencia machista, non só durante a celebración das festas oficiais de Compostela senón durante todo o ano.

Por todo o anterior, o Grupo Municipal de Compostela Aberta presenta á consideración do Pleno o seguinte **ACORDO**:

Instar ao goberno local a

- 1. Levar adiante, en colaboración cos centros de ensino secundario e a USC, unha campaña de sensibilización e prevención contra as agresións sexuais que poida ser implementada ao comezo do vindeiro curso, en setembro de 2021.**
- 2. Asegurar os recursos necesarios para garantir espazos no municipio máis seguros (ben iluminados e sinalizados) tal e como demanda o colectivo de universitarias do Campus do Medo.**
- 3. Pór en funcionamento a App municipal contra as violencias machistas “Alerta Lila”.**

4. Organizar obradoiros municipais de autodefensa feminista que permitan traballar dende o punto de vista físico e emocional as ferramentas para loitar contra as violencias machistas.
5. Pór en funcionamento durante todo o ano Puntos Lilas de información nos espazos públicos de Compostela.

Santiago de Compostela, 22 de xuño de 2021


Marta Lois González
GRUPO MUNICIPAL
Portavoz do grupo municipal de Compostela Aberta



Á ATENCIÓN DO ALCALDE DE SANTIAGO